

M014: Priester Arnold: 'Loblied a.d. hl. Geist' ('Von der Siebenzahl')

0,1 antiquis in temporibus .
0,2 dô kom der spiritus sanctus .
0,3 in specie columbae .
0,4 in einer tûben bilede .
0,5 von himele in algerihtē .
0,6 ze der liute gesiht .
0,7 die dere kristenheit verjâhen .
0,8 same schulen wir in noch tougenlîche entwâhen .
0,9 sô wir des hêren gelouben verjehen
0,10 doch wir sîn mit den ougen niene sehen .
0,11 er wonet iedoch mitsament uns
0,12 in namen des vateres und des sunes .
0,13 und des heiligen geistes .
0,14 beginnen wir ditzes liedes .
0,15 wie mehte ich hêre trehtîn .
0,16 wære mir daz houbet êrîn
0,17 stælin diu zunge .
0,18 die grôzen mandunge
0,19 iemer vûre bringen .
0,20 ze sagen oder gesingen .
0,21 des von dir geschriben ist .
0,22 sô manicvalt sô dû bist .
0,23 iz ne sî daz ich genieze
0,24 dô si scholten predigen daz dû siu hieze .
0,25 ûf tuon vile unvorhtende den munt .
0,26 der heilige geist tet in die rede kunt .
0,27 daz si wæren unbescholten .
0,28 swâ si reden wolten .
0,29 daz wile ich gedingen .
0,30 unz ich langest welle sagen oder singen
0,31 wole dû heiliger geist .
0,32 dû übel unde guot weist
0,33 nechein gedanc ist sô kleine .
0,34 dû ne wizzest in eine .
0,35 swaz sô wir getuon ze guote .
0,36 daz sendest dû uns ze muote .

0,37 wande dû wærlîchen bist .
0,38 scrutator cordis .
0,39 und alliu herze hâst geschaffen .
0,40 von diu sint si dir offen .
0,41 sô sprichet der psalmista .
0,42 “cor mundum crea .
0,43 reinez herze schaffe dû trehtîn in mir .
0,44 daz ich getürre vone dir .
0,45 sagen unde singen
0,46 dise rede bringen .
0,47 mit dîner volleist .
0,48 ze lobe deme heiligen geiste”
0,49 nû wile ich iu sagen ze allerêreste .
0,50 von einer zale diu vile hêr ist
0,51 der heilige geist .
0,52 des entvâhen wir allermeiste .
0,53 dô wir werden getoufet .
0,54 unde man uns dritten stunt besoufet .
0,55 doch wir einez dâ hoeren nennen .
0,56 wir schulen driu bekennen .
0,57 daz wazzer sehent diu ougen .
0,58 sô wonent dâr inne tougen .
0,59 pater et filius
0,60 joch der spiritus sanctus
0,61 sô lâzen wir in dâr unde
0,62 des hêrren Adâmes sünde .
0,63 iemer belîben .
0,64 unde gehîwen zuo den siben wîben .
0,65 die von deme heiligen geiste sint gescheiden .
0,66 sô werden wir kristene die dâr êr wâren heidene .
0,67 nû wile ich iu sagen ze gediute .
0,68 welich sîn die siben briute .
0,69 die wir in allen gâhen .
0,70 in der toufe entvâhen .
0,71 joch die septem dona .
0,72 die vâhen wir ouch dâ
0,73 daz sint die siben sinne .
0,74 der kristenlîchen minne
0,75 swie wîten er geverret sî .
0,76 wir geloben iedoch die namen drî
0,77 eine wâre goteheit
0,78 iemer an unmuoze unde an arbeit .
0,79 von den buochen wirdet uns aneschîn .
0,80 welichez die siben gebe sîn .
0,81 dannen wir etelich hoeren schrîben .
0,82 ebenmâzen den wîben .
0,83 alsam der man und daz wîp .
0,84 beidiu sint ein lîp .

0,85 alsô ist über die sêle der geist .
0,86 aller briutegoume meist
0,87 joch der beider kint .
0,88 der lîchnam guotiu werc sint .
0,89 sô haben wir uns zuo gote gemischet .
0,90 obe der heilige geist vone sünden dâ niet erlischet .
0,91 nû wile ich iu sagen sâ
0,92 geheizen ist sapientia
0,93 diu allerêrest gebe .
0,94 die ein iegelich mennische habe
0,95 von deme heiligen geiste entvangen .
0,96 dâ mite schulen wir langen .
0,97 an den Abrahames barm .
0,98 dâ ne mac uns der tôt niht getarn .
0,99 noch nechein slaht arbeit .
0,100 sô bringet uns diu wîsheit .
0,101 zuo den tugenden sô manicvalten .
0,102 dô ne mügen wir alten .
0,103 daz gît uns got ze lône .
0,104 dâ leben wir mit den engelen schône .
0,105 sô ist diu ander gebe sus
0,106 geheizen indellectus .
0,107 die wir von deme heiligen geiste schulen haben .
0,108 swaz sô wir guotes vernemen oder verstên
0,109 daz schulen wir breiten unde mêren .
0,110 unser tumbern lêren .
0,111 sô mügen wir wole gedingen .
0,112 swanne wir daz wuocher ze jungest vûre bringen
0,113 sô ist daz dritte donum .
0,114 geheizen consilium
0,115 sô iz an den buochen geschriben stât .
0,116 in unser zungen quiut iz rât .
0,117 wæren wir den guoten .
0,118 daz wir einander rieten .
0,119 mit triuwen joch mit wârheit .
0,120 sô ne wære diu heidschaft sô breit .
0,121 noch sô manic sêle in noeten .
0,122 jâ schuof got mit râte .
0,123 nâch sîneme bilede den man .
0,124 der alliu dinc wole kan .
0,125 –[...] ein bizeichen
0,126 er wolte . sich iedoch besprechen .
0,127 mit den nidereren grâden .
0,128 die gebe gît uns der heilige geist von sîn genâden .
0,129 sô ist diu vierde gebe sô .
0,130 geheizen fortitudo .
0,131 iz quiut vile rehte sterke
0,132 daz mügen wir bî den marteræren merken .

0,133 die stuonden vore den vürsten .
0,134 mit michelen getürsten .
0,135 si ne vorhten viur noch daz swert .
0,136 si ne redeten daz gotes wort .
0,137 die bitteren kôle .
0,138 si wuoschen ire stôle .
0,139 mit des lambes bluote .
0,140 dô starkte siu got der guote .
0,141 mit sîneme heiligen geiste .
0,142 in aller wîse meiste .
0,143 muoz er ouch uns beschirmen .
0,144 mennische armen
0,145 vore aller slahte leide .
0,146 unze diu sêle von deme lîchname scheide
0,147 sô ist diu vünfte gebe sâ .
0,148 geheizen scientia .
0,149 daz quiut kunst ze diute .
0,150 unde manet uns tumben liute .
0,151 daz wir lêren wîstuom .
0,152 âne werltlîchen ruom .
0,153 durft ist guoter liste .
0,154 swâ wir dienen Kriste .
0,155 der tiuvel ist sô manicvalt .
0,156 unde hât unsere sünde gezalt .
0,157 in sîne brieve gerihtet .
0,158 der wider unsich vihtet .
0,159 mit viurînen strâlen .
0,160 sô beware der heilige geist âmen .
0,161 nû schulen wir vernemen dâ bî .
0,162 welichez diu sehste gebe sî .
0,163 ze wâre sagen ich iu daz .
0,164 geheizen ist siu pietas .
0,165 daz quiut vile rehte gûete .
0,166 daz uns got behûete .
0,167 mit sîneme heiligeme geiste .
0,168 unsich vellet allermeiste .
0,169 diu starke giredede und der nît
0,170 wir ne bekêren unsich enzît .
0,171 von der übermüete .
0,172 mit milte joch mit gûete .
0,173 die manigen meineide
0,174 werdent der sêle ze leide .
0,175 si müezen dâr umbe brinnen .
0,176 wir scholten einander minnen .
0,177 mit bruoderlîchen triuwen .
0,178 diu sibende gebe dâ bî .
0,179 heizet timor domini .
0,180 daz quiut gotes vorhte .

0,181 der himel und erde warhte .
0,182 daz an niwete stât .
0,183 wan daz iz sîn gewalt enbore hât .
0,184 daz dâ enzwischen ist bevangen .
0,185 daz ne hât niwet übergangen .
0,186 des ime sîn meister gebôt .
0,187 diu helle vorhte in durch nôt .
0,188 wande die zwâ geschefte .
0,189 die got mit sîner krefte .
0,190 schuof nâch sînes lîbes bilede .
0,191 zwêne . sperlinge . wilde .
0,192 die ne mac nieman gevelen .
0,193 sô wir die buoch hoeren zellen
0,194 iz ne welle got verdulten .
0,195 wir werden baz behalten .
0,196 vore aller slahte noeten .
0,197 wande uns die engele vone himele schulen behüeten
0,198 got verlêch uns zwêne geiste .
0,199 under den sibem allermeiste .
0,200 daz wir mit guoten listen .
0,201 got minnen und unseren nâhesten .
0,202 swâ wir daz zerbrechen
0,203 wir dürfen niht sprechen .
0,204 daz wir gotes bot erfüllen .
0,205 swederen wir minnen wellen .
0,206 den anderen hazzen âne nôt .
0,207 di minne beide sint tôt .
0,208 sô stêt iz an der gotes ê
0,209 wir ne biren perfecti in caritatê .
0,210 die zwelivboten kômen enein
0,211 dâr in der gotes sun erschein .
0,212 nâch sîner urstende .
0,213 zeigte in vuoze unde hende
0,214 daz si dester baz erkanten .
0,215 daz er von deme tôde was erstanten
0,216 an den selben stunten .
0,217 er blies ûz sîneme munde .
0,218 den heiligen geist in siu .
0,219 einen grôzen gewalt er in verlie .
0,220 sweme si ire sünde wolten vergeben .
0,221 si hiezen in bruoderlîchen leben
0,222 daz scholten wir noch behüeten .
0,223 sam si dô tâten
0,224 mit bruoderlîchen minnen
0,225 sô mahten wir gesinnen .
0,226 daz wir niene werden gescheiden .
0,227 dâ got sunderet die lieben von den leiden .
0,228 got durch sîne güete

0,229 aber dô samenete
0,230 mit einvaltigen muote
0,231 die zwelivboten guote .
0,232 zuo Jerusâlêm in ein sal
0,233 der heilige geist kom über siu al .
0,234 gelîche in eineme viure .
0,235 si lobeten vile tiure
0,236 den himelischen küninc eine .
0,237 ire gebet daz was reine
0,238 die dâr kristenlîchen wolten leben .
0,239 den wart der zweier geiste einer dô geben .
0,240 in den tugenden allermeist .
0,241 der got die sîne jungere wîste .
0,242 lêrte er siu paternoster .
0,243 in siben gebe ist er
0,244 vile rehte geteilet
0,245 mit den viern wirdet der lîchnam geheilet .
0,246 mit den anderen drîn diu sêle .
0,247 waz bedurfen wir gebe mêre .
0,248 sô sprichet unser hêrre dâ bî .
0,249 nolite multum loqui
0,250 die rede wile ich iu zerloesen .
0,251 ir ne schulet niht vile kôsen .
0,252 sam ethnici tâten .
0,253 die vile liute bâten
0,254 unde wânten daz siu got dester baz vernæme .
0,255 ire gebe was deme heiligen geiste niht gezæme
0,256 Johannes apostolus .
0,257 jâ wart er translatus
0,258 zuo den himelen von der erde .
0,259 dô sach der guote werde .
0,260 alsô geistlîchen
0,261 vile manigiu wunder unde zeichen .
0,262 ein buoch lac dâ beslozen .
0,263 jâ wolte er gerne wîzen
0,264 waz dâr ane geschriben wære .
0,265 der engel sagete ime mære .
0,266 “dû solt iz ligen lâzen
0,267 got selbe wile iz entsliezen .
0,268 al daz stât geschriben dâ
0,269 et aperire signacula .”
0,270 Johannes evangelista .
0,271 schrîbet vone Kriste .
0,272 unde von deme heiligen geiste .
0,273 ûz den himelen allermeiste
0,274 er sagete uns urkûnde
0,275 wie er siben insigele vûnde .
0,276 die wolte er gerne entsliezen

0,277 der engel ne liez in .
0,278 des was der hêre in sorgen .
0,279 er vorhte daz dâr inne wære verborgen .
0,280 daz got mennische wolte vertîligen
0,281 wande unser vorderen wîlen .
0,282 vermaneten sîn gebot .
0,283 diu Israhele worhten ire apgote .
0,284 ûz êre gegozzen .
0,285 sît wurden diu siben insigele entslozzten
0,286 uns allen ze trôste .
0,287 dô got sîne hantgetât erlôste .
0,288 nû ist uns getân ze wizzen .
0,289 wie diu siben insigele wurden entslozzten .
0,290 die got hier in erde worhte
0,291 durch sîner kinde vorhte
0,292 kûnde wart er ze êreste .
0,293 einer megede allerhêresten .
0,294 die boteschaft warf der angelus .
0,295 dô wart er incarnatus .
0,296 Johannes in dô toufte .
0,297 Judas in verkoufete .
0,298 an daz kriuze wart erhangen
0,299 dô wâren vier zeichen ergangen .
0,300 bevolhen wart er der erde .
0,301 an deme dritten tage erstuont er werde
0,302 dô vuor er in sînes vateres lant
0,303 sider sante uns der heilant .
0,304 den heiligen geist ze trôste .
0,305 wie tiure er unsich dô an der stunte erlôste
0,306 nû vernemet waz ich iuch lêre .
0,307 eine zale diu ist vile hêre
0,308 die man siben nennet .
0,309 sô astronomia wirdet erkennet
0,310 sibene sint der himele .
0,311 unde loufent dâr nebene .
0,312 sternen sibene liehte .
0,313 die got schuof von niehte
0,314 nâch sînes selbes willen .
0,315 die ander stênt alle stille .
0,316 ob der wolken krefte .
0,317 der wint vüeret dei wazzer in lufte .
0,318 arcus treit den brunnen .
0,319 unde liuhtent uns siben sunnen .
0,320 diu mæninne schînet werde .
0,321 und ist breiter denne diu erde .
0,322 diu wandelet sich doch sibenstunt .
0,323 daz ist uns allen wole kunt .
0,324 siben tage sint in der wochen

0,325 diu zale ne wirdet niemer zebrochen
0,326 ich sage iu waz daz meinete .
0,327 daz diu mæninne krump wirdet unde kleine .
0,328 alsô si an daz niuwe gât .
0,329 unde iewederenhalben ein horn hât .
0,330 sô nâhet ire der sunne
0,331 unde benimet ire schîn unde wünne
0,332 si ne ist alsô berht niht
0,333 ir beneme der sunne daz lieht .
0,334 bî des er sie mac gereichen .
0,335 dâ mügen wir zwei zeichen .
0,336 merken bî den hornen .
0,337 diu kindelîn niugeborenen .
0,338 biledet si an der kleine
0,339 daz ne tuont anderiu signa necheiniu
0,340 nû werdent abe sunder .
0,341 zeichen unde wunder .
0,342 diu mæninne welzet umbe
0,343 die wir êr sâhen tunkel unde krumbe .
0,344 unde wîchet von deme sunnen
0,345 dannen ire des schînes was zerunnen . alsam
0,346 si die himele trîben
0,347 unze si wirdet ze einer halben schîben .
0,348 daz ist daz dritte zeichen
0,349 daz magen wir aber gelîchen .
0,350 in mennisches krefte .
0,351 swenne er halp krafte .
0,352 wîset an deme lîbe .
0,353 daz bezeichnenet diu mæninne joch diu schîbe
0,354 diu mæninne wehset abe sâ .
0,355 unze si wirdet plena et rotunda .
0,356 ze einer vollen schîben
0,357 nû lâzen wir belîben .
0,358 die tiefen rede dare .
0,359 wir ne mügen iz allez perscrutari .
0,360 sô verre durchgrunden .
0,361 dâ wirdet ze den vierden stunten .
0,362 ein zeichen nâch mîneme sinne .
0,363 von der mæninne
0,364 ouch megen wir diu zeichen .
0,365 mennischen gelîchen .
0,366 swenne er in der jugende .
0,367 wirdet in all tugende .
0,368 wehset ze eineme ganzen manne
0,369 sô nimet er abe danne .
0,370 ie mêre unze an sîn ende
0,371 daz machent uns die sünde .
0,372 dô diu mæninne swindet .

0,373 dô si wider deme sunnen windet .
0,374 si ne gât niht ze sedele .
0,375 an deme niuwe noch an deme wedele .
0,376 und ne wirdet niemer müede .
0,377 daz bewær ich an deme liede
0,378 dâr vüeret sie diu gotes kraft
0,379 sich verwandelt abe diu ire geschäft
0,380 ze einer halben schîben .
0,381 sô beginnet si aber leiben
0,382 unze die drîzic tage ergênt .
0,383 daz ist daz vünfte zeichen
0,384 tunc erunt signa
0,385 zeichen werdent aber sâ .
0,386 an der mæninne .
0,387 unde an deme schîne dâr inne
0,388 krump wirdet si unde smal .
0,389 diu êr was sinewel sam ein bal .
0,390 zeichen tuot si in eineme horne
0,391 alsam êr dâ vorne .
0,392 dô si ze êreste an daz niuwe gie .
0,393 diu selben zeichen sihet man hier .
0,394 êr der mânôt ergê .
0,395 siben zeichen tuot si êr .
0,396 alsô ir mich hoertet nennen
0,397 dâ müget ir bî bekennen
0,398 mennisches tugende .
0,399 jâ wirdet dicke in alter sam in jugende
0,400 unsich ne haben die mâge betrogen .
0,401 der sunne löufet den bogen .
0,402 diu mæninne die senewen
0,403 daz mâzent si an den himelen
0,404 der sunne gât die krümbe
0,405 diu mæninne kumet umbe .
0,406 in einliven tagen . êr
0,407 der terminus gestê
0,408 ze dere selben jâres vriste .
0,409 daz vunden si mit listen .
0,410 der sunne sûmet sich under diu
0,411 der muoz sîneme cursu .
0,412 zweliv zeichen durchgân
0,413 in der iegelîcheme stân .
0,414 zwâ wîle oder drî .
0,415 daz vunden astronomi
0,416 er kom unze an daz trum .
0,417 sol in aquarium .
0,418 sô kumet vile schiere after des
0,419 sol in pisces .
0,420 er kumet unze an daz trum

0,421 sol in taurum .
0,422 sô kumet gezale sô daz geschôz .
0,423 sol in geminos .
0,424 er kumet unze an daz trum .
0,425 sol in cancrum .
0,426 sô kumet abe nâch deme
0,427 sol in leonem .
0,428 sô kumet aber nâch deme
0,429 sol in virginem .
0,430 sô kumet danne vile vram .
0,431 sol in libram .
0,432 sô kumet aber nâch deme
0,433 sol in scorpionem .
0,434 er kumet unze an daz trum .
0,435 sol in sagittarium .
0,436 sô kumet ze allerjungeste an daz trum .
0,437 sol in capricornum .
0,438 wie mahten wir daz râten .
0,439 vone wanne daz allez ist computatum .
0,440 die philosophi daz jâr vunden
0,441 in wîlen unde stunten
0,442 mânôden und in wochen .
0,443 daz hân ich allez argumentando gesprochen .
0,444 von der mæninne
0,445 zênzic tûsent mîle
0,446 unde sehse unde zweinzic
0,447 dâr zuo tûsent zwire
0,448 sam vile dannen
0,449 hin ûf zuo dere sunnen .
0,450 drîe stunte samenunge abe sâ .
0,451 habent duodecim signa .
0,452 dâr under stât macrocosmus .
0,453 die mâze vant Pythagoras .
0,454 manigiu wunder dâ bî .
0,455 vile sagacis ingenii .
0,456 got schuof den sunnen .
0,457 deme tage ze mandunge .
0,458 unde die mæninne dâ bî .
0,459 ut praeesset nocti .
0,460 daz si licht bære .
0,461 dere naht vore wære .
0,462 schuof sternen dâ zuo .
0,463 die loufent spâte unde vruo .
0,464 daz sint siben zeichen .
0,465 diu sich allezane wegent unde leichent .
0,466 doch unsich dunken stille .
0,467 tamquam scintillae .
0,468 beidiu wîle unde stunte .

0,469 in arundinet0 discurrunt .
0,470 dû septiformis .
0,471 siben bilede dû bist .
0,472 hêrre in dîner goteheit .
0,473 dîn gewalt ist michel unde breit .
0,474 der chrisma joch daz oleum .
0,475 bezeichnenent den spiritum sanctum .
0,476 dâ mit er uns den heiligen geist verlîhet .
0,477 dâ werdent ouch alle keisere mit gewîhet .
0,478 dâ wart ouch Adâm mit bestrichen .
0,479 dô Luzifer hæte beswichen .
0,480 dô er übergieng die gotes ê
0,481 dô vienc er oleum misericordiae .
0,482 mit deme oleo wart er erbarmet .
0,483 dâ wirdet diu kristenheit mit gefirmet .
0,484 alliu goteshûs bestiftet .
0,485 nunnan unde müniche . ze gotes dieneste gerihtet
0,486 sô vinden wir aber geschriben dâ
0,487 wie Johannes wîhte in Asia .
0,488 sebttem ecclesias
0,489 den heiligen geist bezeichnenet noch daz .
0,490 an den selben buochen
0,491 wolten wir ez wîten suochen .
0,492 sô vunden iz die pfaffen .
0,493 daz ein iegelich mennische bî sibenen ist geschaffen
0,494 nû schulen wir niene erwinden .
0,495 êr wir underbinten .
0,496 die rede disen liuten .
0,497 allegorice gediutet .
0,498 sô daz wîp wirdet swanger .
0,499 sô ne ist niht langer .
0,500 der sâme verborgen .
0,501 wære unze an den sibenden morgen
0,502 sô verwandelet got der guote .
0,503 den sâmen ze bluote .
0,504 über siben tage sô
0,505 wirdet daz bluot caro .
0,506 dannen über siben tage .
0,507 wehset âder unde mage .
0,508 über siben tage kumet iz aber ne eine
0,509 sô wehset daz bein .
0,510 sô schepfet danne der gotestrût .
0,511 über siben tage die hût .
0,512 hâr unde nagele
0,513 über tage sibene .
0,514 daz sint sehs wochen .
0,515 sô ist der mennische aller geschaffen .
0,516 nû wile ich iu sagen ze diute .

0,517 umbe siben alter der liute
0,518 dei nenne ich iu sâ .
0,519 daz ein ist infantia .
0,520 sô ist daz ander aber sâ .
0,521 geheizen pueritia .
0,522 sô ist daz dritte aber sâ .
0,523 geheizen adulescentia .
0,524 sô ist daz vierde aber sus .
0,525 geheizen iuventus .
0,526 ze wâre sagen ich iu daz .
0,527 daz vünfte heizet aetas .
0,528 sô ist daz sehste aber sus .
0,529 geheizen senectus .
0,530 ze wâre sagen ich iu daz .
0,531 daz . decrepita aetas .
0,532 ist daz sibende genennet .
0,533 dâ mit uns des lîbes zerrinnet
0,534 von deme heiligen geiste .
0,535 haben wir siben liste .
0,536 alsô stât geschriben dâ .
0,537 daz ein ist grammatica .
0,538 sô ist diu ander aber sâ .
0,539 geheizen dialectica .
0,540 diu dritte heizet musica .
0,541 diu vierde rethorica .
0,542 sô ist diu vünfte aber sâ .
0,543 geheizen arithmetica .
0,544 sô ist diu sehste sâ .
0,545 geheizen geometria .
0,546 sibende der liste vrîe .
0,547 verlêch uns got ze minnen .
0,548 die sint erwelt ûz anderen den sennen .
0,550 wir schulen iu antvrîsten
0,551 von den siben listen .
0,552 vile underschidelîchen des .
0,553 umbe die septem liberales artes .
0,554 daz eine ist der
0,555 gewizzente in den buochen .
0,556 der ander dâr engegene .
0,557 der die wârheit unde die louge .
0,558 enzwischen den beiden .
0,559 mit gevuoge kan bescheiden .
0,560 der dritte der mit künste .
0,561 ein sanc wole kan gerihten .
0,562 der vierde deme des got gan .
0,563 daz er daz lant rehte wole kan .
0,564 al nâch sîneme willen .
0,565 der vünfte der kan zellen .

0,566 der sehste der kan mezzē .
0,567 unde hât sich gevlizzen .
0,568 der sibende mac gelernen .
0,569 daz er kiuset an den sternē .
0,570 vile manigiu zeichen bî der naht .
0,571 diu wunder manicslaht .
0,572 die von den siben sinnen
0,573 der mennische mac gewinnen .
0,574 swanne daz kindelîn wirdet geboren .
0,575 sô schal iz der vater wole bewaren
0,576 unze an den vierzigesten tac .
0,577 wande diu muoter ne mac .
0,578 vore den ire noeten .
0,579 daz kindelîn behüeten
0,580 sô grîfe danne diu muoter dâr zuo .
0,581 unde bewar iz spâte unde vruo .
0,582 diu siben jâr mitalle .
0,583 daz iz in daz wazzer niene valle .
0,584 noch in deme viure niene verbrinne .
0,585 unz iz den heiligen geist gewinne .
0,586 ze sîner ê toufe .
0,587 unde êr iz der tôt begrîfe .
0,588 sô schol der êwart .
0,589 mit den gotes worten
0,590 sînen pfarreman bewarn .
0,591 daz ime der tiuvel niene müge getarn .
0,592 nâch der kerrîne
0,593 umbe die schulde sîne
0,594 die siben jâr mitalle .
0,595 daz er in daz unreht niene valle .
0,596 noch in sünden niene verbrinne .
0,597 swenne er gotes hulde gewinne
0,598 swer gotes sô verlougenet .
0,599 daz er sîneme ebenkristene tuot den tôt .
0,600 der hât sich selben erslagen .
0,601 sô wir dei buoch hoeren sagen .
0,602 sô schal er vile harte gâhen .
0,603 vierzic tage entvâhen .
0,604 mit der stôle von dem pfaffen .
0,605 alsam der mennische in vierzic tagen wirdet geschaffen
0,606 ze brôte unde ze brunnen .
0,607 sô ist er aber deme tiuvel entrunnen .
0,608 ze wâre sagen ich iu daz
0,609 unde wirdet lebentic alsam er êr was .
0,610 nû vernemet ir wole ze gediute .
0,611 tumben leie liute .
0,612 ir maget vile wole verstanten .
0,613 dunket iz iuch niht enblanden

0,614 swanne der man vihtet
0,615 sîn wâfen ûf rihtet .
0,616 sô kêret der manslegge .
0,617 deme swerte daz ein egge
0,618 über sîn se[l]bes houbet .
0,619 sô wirdet diu sêle ertoubet .
0,620 den lebentigen schal er vasten .
0,621 den tôten lâzen rasten .
0,622 im ne ist dere vasten borenôt .
0,623 er hât ime selben getân den tô
0,624 wir werden siben stunte .
0,625 von den sünden entbunden .
0,626 ob wir iz gevorderen sô
0,627 ze allerêreste in baptismo .
0,628 geantlâzet wirdet uns aber sâ .
0,629 in sancta eucharistia .
0,630 sô wirdet diu sêle vile vrô .
0,631 dritten stunte in martyrio .
0,632 daz reine almuosen .
0,633 schal unsich ze deme vierden mâle erloesen .
0,634 ze deme vünften mâle diu vaste .
0,635 diu minne ist allerbezzeste
0,636 die wir ze deme sehsten mâle scholen haben
0,637 ob wir siben stunte vergeben
0,638 unseren vîanden
0,639 sô werden wir erloeset von des tiuveles banden .
0,640 siben stunte geschâhen
0,641 zeichen in al gâhen
0,642 alsô unser hêrre wart geboren
0,643 dô wart ze Rôme erkoren
0,644 ein küninc der wart genennet sus .
0,645 Caesar Augustus
0,646 der rîchesenete dô .
0,647 gewalticlîchen in toto mundo .
0,648 der küninc bezeichnenete
0,649 den alwaltigen got .
0,650 keiser aller küninge
0,651 der des tages kom her in erde
0,652 unde hier rîchesen began .
0,653 unze er unsich alle gewan .
0,654 ûz des tiuvels gewalt .
0,655 sam ên vile dicke uns vore hât gezalt .
0,656 der küninc got niene vorhte .
0,657 iedoch vride er worhte
0,658 in allen den rîchen .
0,659 sô si niene gewonnen samelîchen .
0,660 des selben tages kom uns aber sâ .
0,661 von den himelen pax vera

0,662 aller vride bezziste .
0,663 mit deme heiligem Kriste .
0,664 des loben wir den dînen sun
0,665 qui fecit utraque unum .
0,666 an den selben stunten
0,667 die wâren gevangen . unde gebunden .
0,668 in karkære gestôzen .
0,669 die hiez der küninc lâzen .
0,670 dô hiez wirken aber sâ .
0,671 eine wâge diu hiez drachma .
0,672 er gebôt in bî deme halse .
0,673 daz si die ime gæben ze zinse .
0,674 alle gelîche .
0,675 die dâr wâren in sînem rîche .
0,676 diu drî pfenninge wac
0,677 dô schach an deme selben tage .
0,678 daz uns got gevrîte
0,679 von vile micheleme strîte .
0,680 gelouben wir die namen drî .
0,681 mit dem zinse biren wir vrî .
0,682 ze deme êwigem lîbe .
0,683 jâ wart der küninc edele geboren von eineme wîbe .
0,684 Caesar Augustus
0,685 dô tet er aber sus .
0,686 vile wîslîchen
0,687 er vertreip ûz sîneme rîche .
0,688 die ire hêrren wâren getrunnen .
0,689 den wolte er sînes landes niht gunnen .
0,690 die des niht wolten tuon .
0,691 die hiez er alle houbeten
0,692 an deme einen tage ze wâre .
0,693 hiez er slahen mêre .
0,694 denne drîzic tûsent lîbe .
0,695 manne unde wîbe .
0,696 die ire heimuote . niene mahten gereichen
0,697 daz was daz vierde zeichen .
0,698 daz sint noch die verworhten .
0,699 die got niene wellent vûrhten
0,700 noch ire schepfære minnen
0,701 die sint ire hêrren entrunnen
0,702 an deme jungesteme tage .
0,703 mit deme êwigeme slage .
0,704 slehet si got ze tôde
0,705 mit lîbe joch mit sêle .
0,706 in daz apgründe
0,707 dâ wonent si iemer âne ende
0,708 des selben tages schein ein sterne .
0,709 daz sâhen ungerne .

0,710 die juden in deme lande
0,711 daz zeichen was in ante .
0,712 daz was gewîssaget êr .
0,713 dô kom lumen de lumine .
0,714 licht von liechte
0,715 got von himele brâhte
0,716 uns daz êwige licht .
0,717 daz ne lûhte êr bevore nieht .
0,718 den die in dere vinsten wâren .
0,719 dô der mâne joch der sunne ire schînen verbâren .
0,720 nû saget uns der guote Matheus
0,721 wie ein güldîn circulus .
0,722 alumbe [vienge] den sunnen .
0,723 dô diu maget den gotes sun hæte gewonnen
0,724 der mit sîner krefte .
0,725 umbe vâhet alle gescheft .
0,726 in caelo et in terra .
0,727 in deme apgründe alsô verre .
0,728 dô er die helle beslôz unde ûf tete .
0,729 mundum pugillo continet
0,730 dô wart ein zeichen vile grôz
0,731 durch die Tiber vlôz
0,732 mitten über ein ölevaz .
0,733 daz vile manic man gesach
0,734 ze wâre sagen ich iz iu
0,735 daz wâren zeichen sibenu .
0,736 diu in deme eineme tage geschâhen .
0,737 sô Rômære jâhen .
0,738 dô bezeichnenete daz oleum
0,739 magnum misterium
0,740 wie uns got allenthalben
0,741 die wunden wolte er salben .
0,742 mit sîneme heiligen geiste
0,743 daz bezeichnenete daz oleum allermeiste .
0,744 nû erteilent uns die canones .
0,745 septem generationes
0,746 unde zelent von eineme rippe .
0,747 vile rehte sibene sippe .
0,748 Matheus zelt uns dâ bî .
0,749 sex aetates mundi .
0,750 dere werlt sehs altere .
0,751 in deme sibenden werden wir beha[l]ten .
0,752 ze deme êwigen lîbe
0,753 dâ unsich in libro vitae schrîbet .
0,754 nû hoeren wir dei buoch jehen .
0,755 wie eineme iegelîchen mennischen schol geschehen .
0,756 ze sîneme lebene
0,757 herzenleit sibene .

0,758 in deme sibenden leide .
0,759 schal er von der werlte scheiden .
0,760 ze der êwigen heimuote .
0,761 dâ vergizzet er sîner noete
0,762 daz sagen ich iu ze wâre .
0,763 dâ dunkent tûsent jâre
0,764 nicht langere . newar sam ein tac .
0,765 nechein ouge ne mac .
0,766 die genâde durchschouwen
0,767 die wir dâ schulen bûwen
0,768 besitzen unde niezen .
0,769 dannen der tiuvel
0,769a durch sîn übermuot
0,769b in die helle wart bestôzen
0,770 wir brinnen in deme sibenten zîte .
0,771 unde heizen Ismahelite .
0,772 in tertia aetate .
0,773 mit des hêrren Abrahames râte .
0,774 wurden wir kint der diu
0,775 von dannen ne haben wir triuwe .
0,776 wir scholten heizen Israhel
0,777 behielte wir unser ê
0,778 diu werlt ist komen unze an daz trum
0,779 genus viperarum .
0,780 heizen wir vile rehte .
0,781 wir biren der viperen geslehte
0,782 des hêrren Abrahames Sâre .
0,783 diu was niunzic jâre
0,784 êr si kint gewünne .
0,785 bî deme ire manne .
0,786 jâ loubete ime diu vrouwe .
0,787 daz er slief bî sîner diuwe .
0,788 dâ bî gewan er ein kint
0,789 dannen huop sich diu kristenheit sint .
0,790 der engel sprach zuo Abrahame .
0,791 “dîn kone Sara
0,792 schol dir ein sun gebern .
0,793 des dû nû vile lange begundest gern .”
0,794 des vröuweten si sich beidiu
0,795 si hiezen daz kindel unde die diu .
0,796 ûz deme hove werfen .
0,797 “nû wir des kebessunes nicht bedurfen .”
0,798 alsô zelt uns daz liet .
0,799 von deme sune kumet diu heidenische diet
0,800 die êbrêischen liute .
0,801 die gote wâren trûte .
0,802 vone der vrouwen Sâran .
0,803 hei wie manige werlt si sint gebâren

0,804 nû vernemet waz ich iuch lêre .
0,805 waz wirdet deme manne mêre .
0,806 al des er gewinnet
0,807 sô ime des lîbes zerrinnet .
0,808 er ne habe ez hine vûre gesendet .
0,809 sô ist iz wole gewendet .
0,810 dâ ne verizzet iz ime daz rot .
0,811 daz beheltet ime got .
0,812 vore der milwen unde vore deme diebe
0,813 tuot iz iuwer sêle ze liebe
0,814 denket an den kûmftigen tât .
0,815 der iu alle tage nâhet .
0,816 mit micheleme zorne .
0,817 sô begegenet iu dâ vorne
0,818 got mit sîneme lône .
0,819 in aeternq mansione
0,820 nû loben wir mînen trehtîn .
0,821 joch den heiligen geist sîn .
0,822 die namen alle drîe .
0,823 septies in die
0,824 alle tage siben stunte .
0,825 lobet dich vile manic munt .
0,826 ze vespere joch ze mettene .
0,827 schulen wir spâte unde vruo sîn .
0,828 ze gotes dieneste .
0,830 daz gebiutet uns der psalmista Dâvît .
0,831 dô er machete die tagesît .
0,832 ze prîme joch ze terzje .
0,833 loben wir gewisse .
0,834 ze sexte und ze nône .
0,835 sô loben wir dich schône .
0,836 an der complête .
0,837 loben wir dîne gûete .
0,838 sô dû vile wole wert bist .
0,839 laudate dominum de caelis .
0,840 nû lobent dich aber sâ .
0,841 sol et luna .
0,842 der sunne joch diu mæninne .
0,843 die sternen loben dich under in
0,844 unde loben dich trehtîn überal .
0,845 beidiu berc unde tal .
0,846 holz unde steine .
0,847 loben dich trehtîn eine .
0,848 unde al daz ûf der erde ist .
0,849 laudate dominum in excelsis .
0,850 nû loben dich trehtîn aber sâ .
0,851 maria et flumina .
0,852 wazzer unde brunnen .

0,853 unde loben dich alle zungen .
0,854 vische . unde vogellîn .
0,855 loben dich hêrre trehtîn .
0,856 loben dich dîner krefte .
0,857 alle die geschefte .
0,858 daz lebentiges ûf der erde ist .
0,859 laudate dominum de caelis .
0,860 nû loben dich trehtîn werde .
0,861 die himele joch diu erde .
0,862 loben dich hêrre dâ bî .
0,863 omnia sidera caeli .
0,864 joch daz firmamentum .
0,865 lobe [dich] hêrre unde den dînen sun .
0,866 die wurze joch daz ander krût .
0,867 loben dich hêrre gotes trût .
0,868 wande dû des schepfære bist .
0,869 laudate dominum in excelsis
0,870 nû loben wir dich aber sâ .
0,871 in psalterio et cithara .
0,872 mit salmen joch mit seitenspile .
0,873 dich lobent engel vile .
0,874 ane roufent si dich sus .
0,875 alle queden si "sanctus ."
0,876 allez daz ûf deme himele ist .
0,877 laudate dominum de caelis .
0,878 nû loben dich trehtîn aber sâ .
0,879 rores et pruina .
0,880 regene unde die winde .
0,881 unde alliu apgründe .
0,882 die bûhele joch die lewen .
0,883 die beche joch die sêwe .
0,884 unde al daz dâr ie wart unde iemer ist .
0,885 laudate dominum in excelsis
0,886 disiu dinc sint alliu geordenet .
0,887 sô ez got selbe gebôt .
0,888 deme heiligen geiste ze êren .
0,889 daz wir sîn lop dâr mit mêren .
0,890 nû loben wir in mit rehte .
0,891 sîne genâde ist manigere slahte .
0,892 über unsich mennischen arme .
0,893 von ime sô biren wir warme .
0,894 von ime sô haben wir varwe .
0,895 von ime sô biren wir marwe .
0,896 von ime sô biren wir grüene .
0,897 von ime sô biren wir küene
0,898 von ime sô biren wir schoene
0,899 in hiute joch in hâre .
0,900 von ime sô biren wir reine .

0,901 in vleische joch in beine .
0,902 von ime sô haben wir den ganc .
0,903 von ime sô [haben] wir den gedanc .
0,904 von ime daz wir gehoeren .
0,905 sehen unde rüeren .
0,906 stinken unde smecken .
0,907 slâfen unde wachen .
0,908 loufen unde springen .
0,909 sagen unde singen .
0,910 ligen unde leinen .
0,911 siuften unde weinen
0,912 sitzen unde stanten .
0,913 mit vuozen joch mit handen .
0,914 mit lîbe joch mit sêle .
0,915 sô loben wir den dînen geist trehtîn hêrre .
0,916 durch des heiligen geistes minne
0,917 sô vant disiu kurzlîchen wort .
0,918 ein priest der hiez Arnolt .
0,920 von siben allermeiste
0,921 saget er von deme geiste
0,922 daz er desten mêre entgelte .
0,923 swer sô die zale beschelte .
0,924 wir lasteren weter unde zît .
0,925 unde allez daz uns got gît .
0,926 sîn selbes willen wir nicht erkennen .
0,927 swie dicke wir in nennen .
0,928 der tiuvel heizet sînen âtem .
0,929 die kristenheite verrâten .
0,930 joch des wâren gelouben .
0,931 alle tage berouben .
0,932 manigere guoten werke .
0,933 irret er unsich starke .
0,934 daz allerhêreste urschîm .
0,935 sô gemarteret wart mîn trehtîn .
0,936 daz heizet er ane schrîen .
0,937 die vile tumben leien .
0,938 joch die mittewochen .
0,939 in der ôsteren wochen .
0,940 si sprechent daz si krump sî .
0,941 "venite benedicti ."
0,942 singet man vile gewisse .
0,943 des selben tages ze messe .
0,944 dâ mit ladete . mîn trehtîn .
0,945 ze allerjungeste die rehten .
0,946 in sînes vateres rîche .
0,947 dâ lebent si geistlîchen .
0,948 iemer âne ende .
0,949 nû heben wir ûf die hende .

0,950 in der wâren minne .
0,951 unde biten daz wir die stimme .
0,952 alsô sûeze müezen [hoeren] .
0,953 [ze] den himelischen koeren .
0,954 müezen wir geladet sîn .
0,955 in iudicio domini .